

Vedteke forslag til Forskrift om gravplassvedtekter, Lesja kommune, Innlandet

Vedteke av Lesja kyrkjelege råd 2. juli 2026 med heimel i lov av 7. juni 1996 nr. 32 om gravplassar, kremasjon og gravferd (gravplasslova) § 21 første ledd, § 8 første ledd og § 14 første ledd og forskrift til lov om gravplassar, kremasjon og gravferd av 10. januar 1997 nr. 16 (gravplassforskrifta) § 15a fjerde ledd.

Godkjent av Statsforvaltaren i Vestfold og Telemark , jamfør lov av 7. juni 1996 nr. 32 om gravplassar, kremasjon og gravferd (gravplasslova) § 21 første ledd.

§ 1 Forvaltning

Lesja kyrkjeleg råd er gravplassmyndigheit i Lesja kommune.

§ 2. Definisjonar

Festa grav: Grav som det er inngått eller fornya festeavtale for.

Festa gravstad: Fleire kistegraver som er festa saman.

Ordinær urnegrav: Grav til oskeurne med plass til fire urner.

Urnegrav i minnelund: Grav til oskeurne i minnelund med plass til éi urne.

Kistegrav: Grav som følgjer gravplassforskrifta sine krav til storleik for gravlegging av kister. I ei kistegrav kan ein òg gravleggje oskeurner.

Fredingstid: Tidsrom frå siste gravlegging til ein kan nytte grava igjen til ny gravlegging.

Festetid: Tida som det er avtalt å feste ei grav.

Gravansvarleg: Den som er ansvarleg for ei tilvist grav.

Festar: Den som står som part i ei festeavtale.

Namna minnelund: Gravfelt med felles minnesmerke med namn og data på dei som er gravlagde der.

§ 3. Ferdsel på gravplassane

Besøkande skal om mogeleg ferdast gåande, jf. gravplassforskrifta § 9.

Gravplassmyndigheita kan etter søknad gi løyve til å køyre ved dokumentert sjukdom/forflyttingshemming. All køyring skal skje særleg omsynsfullt.

§ 4. Gravplasstillhøyrse

Avdøde personar i kommunen kan gravleggjast på kva som helst av gravplassane i kommunen.

Dei har rett til fri grav dersom gravplassmyndigheita har tilvist grava. Retten til utvida frigravperiode er nærare regulert i gravplassforskrifta § 16 første ledd og gravplassforskrifta § 18 ande ledd.

Avdøde personar som på grunn av sjukdom eller alderdom har budd i ei anna kommune mot slutten av livet, blir rekna med på same måte som kommunen sine egne innbyggjarar, og har rett til fri grav dersom gravplassmyndigheita har tilvist grava.

Avdøde personar frå andre kommunar kan bli gravlagt i kommunen mot at ein betaler kostnadane ved gravferda og avgift som ved feste av grav.

§ 5. Fredingstid

Fredingstida er 20 år for både kister og urner.

§ 6. Feste av grav med meir

Når ei kistegrav skal takast i bruk, er det høve til å feste ei grav ved sida av ho. Gravplassmyndigheita kan gje løyve til å feste ei ekstra grav i tillegg når behovet tilseier det. Desse gravene utgjør då éin gravstad.

Ved bruk av ei ordinær urnegrav, kan ein ikkje feste ei grav ved sida av.

Ved feste av ei grav ved sida av den kistegrava som ein først nyttar, er festetida 20 år.

Når festetida/fredingstida er ute, kan ein feste grava/gravstaden for nye 10 år. Når det er gått 60 år etter siste gravlegging, kan festet ikkje bli fornya utan etter eit særleg samtykkje frå gravplassmyndigheita. I god tid før festetida er ute, skal forvaltninga varsle festaren.

Har ein ikkje fornya festet innan seks månader etter forfall, går grava eller gravstaden tilbake til gravplassen.

Innbetalt festeavgift blir berre betalt tilbake dersom tilbakebetaling følgjer av bindande rettsreglar eller det ligg føre særlege grunnar.

Ein kan ikkje gravlegge i ei grav utan samtykke frå gravansvarleg eller festar. Dersom det ikkje er råd å hente inn samtykkje frå gravansvarleg eller festar, kan gravplassmyndigheita avgjere gravlegginga.

Festar pliktar å melde adresseendring.

§ 7. Grav og gravminne

Ved opning av ei grav kan ein legge jorda på dei omkringliggande gravene og ein kan mellombels flytte gravutstyret. Gravplassmyndigheita sørgjer for istandsetting igjen, og vil og sjå til at grava blir planert og tilsådd med gras etter gravlegging. Montering av gravminne kan først skje etter at gravplassmyndigheita har godkjent gravminnet og merka staden der det skal stå. Det kan ikkje bli sett opp tidlegare enn 1 månad etter gravlegging av kiste. Gravminne på urnegrav kan ein sette opp med ein gong etter urnenedsettinga. Så lenge ein ventar på gravminne, kan gravplassmyndigheita sette opp et merke med namnet til avdøde.

På ein nyfesta gravstad skal gravminnet plasserast i bakkant av den grava ein først nyttar. Gravminnet blir ståande der for godt.

§ 8. Plantefelt

Framfor gravminnet er det høve til å opparbeide eit plantefelt i høgde med bakken omkring. Det må ikkje vere breiare enn gravminnet si breidde, men kan i alle tilfelle vere opp til 60 cm breitt. Det kan ikkje stikke lengre fram enn 50 cm, målt frå gravminnet sin framkant. Det kan ikkje plantast vekstar som går over høgda til gravminnet eller går ut over plantefeltet.

I plantefeltet er det høve til å setta ned dekorgjenstandar og sorguttrykk, så lenge dei ikkje er til sjenanse, gjer drifta av gravplassen vanskeleg (opning av grav, grasklipping, o.l.), eller er brannfarleg i samband med tenning av ljøs, jamfør neste ledd.

Det er høve til å tenne ljøs (stearinljøs, oljelampe ol.) når dette er innanfor dei gjeldande føresegnene om brannvern. Lykter og ljøs må vere tilstrekkeleg festa, til dømes med jordspyd, eller ha ei eigenvekt som gjer at dei ikkje kjem på avvegjar.

Plastljøs med eller utan metallhette/lokk må plasserast i lykter. Plastljøs kan spreist med vinden og bli teke av fuglar, og kan skade vilt, beitedyr og matproduksjonen (dyrka mark).

Ein skal fjerne ljøs og andre lause dekorgjenstandar etter bruk.

Det er ikkje høve til ramme inn plantefeltet eller delar av det, med hekk eller andre materiale.

Det er høve til å ramme inn plantefeltet med ein delt steinkant eller ei bedplate som fluktar med terrenget omkring. Bedplate og fundament for gravminne skal ikkje henge saman.

Dersom det ikkje er aktuelt å ha plantefelt, skal det vere grasbakke på alle sider av gravminnet.

Det er ikkje høve til å ramme inn grava med hekk eller andre materiale.

§ 9. Plantemateriale

Planter, kransar og liknande materiale som ein har nytta ved gravferd eller ved pynting av grava, og som endar som avfall, skal vere heilt kompostérbare.

§ 10. Stell av grav

Kvar gravansvarleg eller festar har rett og plikt til å stelle den grava vedkomande har ansvaret for. Plantefelt som ikkje blir tilplanta eller stelt, skal den gravansvarlege eller festaren så til med gras, eller blir tilsådd av gravplassmyndigheita.

Den gravansvarlege eller festaren pliktar å halde gravminnet sikra og i forsvarleg stand.

Gravansvarlege eller festaren kan avtale med Lesja kyrkjelege råd, eller den som får løyve til det etter § 13, om planting og stell av grav, samt montering, sikring og vedlikehald av gravminnet. Ei slik avtale frittek ikkje den gravansvarlege eller festaren frå det ansvaret vedkomande har etter dei til ein kvar tid gjeldande føresegnene.

§ 11. Namna minnelund

Berre urner kan setjast ned i minnelund på gravplassar i Lesja.

Ved urnenedsetting blir det sett opp ei namneplate på felles minnestein som er fastsett av gravplassmyndigheita. På namneplata kan det vera inntil to namn samt fødsels- og dødsdato.

Når ei urnegrav blir teke i bruk, er det mogleg å feste ei ekstra grav, mot at det blir betalt festeavgift frå det tidspunktet fyrste grava blir teke i bruk. Gravene vil ikkje nødvendigvis koma ved sidan av kvarandre i urnefeltet, men namna blir på same plate.

Grav i minnelund kan, på lik line med øvrige graver, festast vidare etter at fredingstida er ute. Det betyr at namneplata blir ståande, men sjølve grava kan (når fredingstida er ute) brukast opp att av gravplassmyndigheita, utan samtykke frå festar.

Gravplassmyndigheita er ansvarleg for planting og stell i minnelunden. Det er ikkje høve til å opparbeide eige plantefelt for grav, men det kan setjast blomebukett og ljøs på felles tilvist plass. Det er ikkje høve til å setja pottedplanter eller pyntegjenstandar ved gravminnet.

Avgift for bruk av namna minnelund skal ein betale frå det tidspunktet grava blir teke i bruk.

§ 12. Bårerom

Gravplassmyndigheita kan stille bårerom til disposisjon for den som står for gravferda. Bårerommet skal berre nyttast til oppbevaring av den døde. Ingen har tilgang utan løyve. Syning kan berre finna stad etter samtykke frå den som står for gravferda, og vedkjem ikkje dei kyrkjeleg tilsette.

§ 13. Næringsverksemd

Næringsdrivande som ønskjer å drive verksemd på gravplassen, skal hente inn løyve frå gravplassmyndigheita. Løyvet kan kallast tilbake dersom vedkomande ikkje rettar seg etter dei reglane som gjeld. Slik verksemd kan berre omfatte montering, sikring og vedlikehald av gravminne, samt planting og stell av graver.

§ 14. Arbeid på gravplassane

Anleggs- og vedlikehaldsarbeid skal skje på kvardagar i arbeidstida (kl. 07:00-17:00) og må ikkje utførast på søndagar, heilagdagane eller offentlege høgtidsdagane. Ikkje noko arbeid på gravplassen må vere til sjenanse for seremoniar eller rituelle handlingar på gravplassen eller i ein bygning på gravplassen. Næringsdrivande kan berre køyre på gravplassen i den grad det er naudsynt for å gjere arbeidet. Slik køyring skal skje ekstra omsynsfullt.

§ 15. Dispensasjon frå vedtektene

Gravplassmyndigheita kan i særlege tilhøve og innanfor ramma av gravplassloven og gjeldande forskrifter fråvike §6 i vedtektene.

§ 16. Ikraftsetjing og oppheving av eldre vedtekter

Forskrifta trer i kraft ein månad frå kunngjering i Norsk Lovtidend. Frå den same tida blir vedtektene, sist revidert 19.11.2025, for gravplassane i Lesja kommune, Innlandet fylke, oppheva.

NYTT FORSLAG